

佛说诸德福田经 1 卷

No. 683

佛说诸德福田经

西晋沙门法立、法炬共译

闻如是：

一时佛在舍卫国祇树给孤独园，与大比丘千二百五十，菩萨万人，大众无数，围绕说法。尔时天帝释与诸欲天子三万二千，各将营从，不可称数，来诣佛所，稽首于地，皆坐一面。

尔时天帝察众坐定，承佛神旨，从坐而起，整服作礼，长跪叉手，白世尊曰：「欲有所问，唯愿彰演垂世轨则！」

佛告天帝：「譬如冥室，不求灯火，焉有所见！善哉问矣，吾当为汝分别说之！」

天帝白佛：「夫人种德，欲求影福，岂有良田果报无限，种丝发之德本，获无量之福乎！唯愿天尊敷扬惠训，令此愚蒙福报无量！」

天尊叹曰：「快哉，天帝！开意所问，法无上矣！谛听，善思！吾当具演，令汝欢喜。」天帝大众受教而听。

佛告天帝：「众僧之中，有五净德，名曰福田。供之得福，进可成佛。何谓为五？一者、发心离俗，怀佩道故；二者、毁其形好，应法服故；三者、永割亲爱，无适莫故；四者、委弃躯命，遵众善故；五者、志求大乘，欲度人故。以此五德，名曰福田。为良为美，为无早丧，供之得福，难为喻矣！」

尔时世尊以偈颂曰：

「毁形守志节， 割爱无所亲，
出家弘圣道， 愿度一切人，
五德超世务， 名曰最福田，
供养获永安， 其福第一尊。」

佛告天帝：「复有七法广施，名曰福田，行者得福，即生梵天。何谓为七？一者、兴立佛图、僧房、堂阁；二者、园果、浴池、树木清凉；三者、常施医药，疗救众病；四者、作牢坚船，济度人民；五者、安设桥梁，过度羸弱；六者、近道作井，渴乏得饮；七者、造作圜厕，施便利处。是为七事得梵天福。」

尔时世尊，以偈颂曰：

「起塔立精舍， 园果施清凉，
病则医药救， 桥船度人民，
旷路作好井， 渴乏得安身，
所生食甘露， 无病常安宁，
造厕施清静， 除秽致轻悦，
后无便利患， 莫见秽恶者。
譬如五河流， 昼夜无休息，
此德亦如斯， 终得升梵天。」

于时座中有一比丘，名曰听聪，闻法欣悦，即从坐起，为佛作礼，长跪叉手，白世尊曰：「佛教真谛，洪润无量。所以者何？我念宿命无数世时，生波罗奈国，为长者子。于大道边，作小精舍，床卧浆粮，供给众僧，行路顿乏，亦得止息。缘此功德，命终生天，为天帝释，下生世间，为转轮圣王，各三十六反，典领天、人，足下生毛，蹶虚而游，九十一劫，食福自然。今值世尊，顾临众生，蠲我愚浊，安以净慧，生死栽枯，号曰真人，福报诚谛，其为然矣！」

尔时听聪以偈颂曰：

「惟念过去世， 供养为轻微，
蒙报历遐劫， 余福值天师。
净慧断生死， 痴爱情无遗，
佛恩流无穷， 是故重自归。」

于时听聪礼已还坐。复有一比丘，名曰波拘卢，从座而起，整服作礼，长跪叉手，白世尊曰：「我念宿命，生拘夷那竭国，为长者子。时世无佛，众僧教化，大会说法，我往听经。闻法欢喜，持一药果，名呵梨勒，奉上众僧。缘此果报，命终升天，下生世间，恒处尊贵，端正雄杰，与众超绝，九十一劫，未曾有病。余福值佛，光导痴冥，授我法药，逮得应真，力能移山，慧能消恶。善哉福报，为真谛矣！」

尔时波拘卢以偈颂曰：

「慈泽润枯槁， 德勋济苦患，
一果之善本， 享福迄今存。
佛垂真谛义， 蒙教超出渊，
圣众佑无极， 稽首上福田。」

于时波拘卢礼已还坐。复有一比丘，名曰须陀耶，即从座起，整服作礼，长跪叉手，白世尊曰：「我自惟念先世之时，生维耶离国，为小家子。时世无佛，众僧行教化。我时持酪，入市欲卖，值遇众僧，大会讲法，过而立听，法言微妙，闻之欢悦，即举瓶酪，布施众僧。众僧祝愿，益怀欣踊。缘此福报，寿终生天，下生世间，财富无限，九十一劫，豪尊荣贵。末后余愆，生于世间，母妊数月，得病命终，埋母冢中，月满乃生。冢中七年，饮死母乳，用自济活。微福值佛，开阐明法，超度死地，逮得应真。谛哉罪福，诚如佛教！」

尔时须陀耶以偈颂曰：

「前为小家子， 卖酪以自存，
欣踊施微薄， 得离三苦患。
虽罪冢中生， 饮乳活七年，
因缘得解脱， 归命圣福田。」

于时须陀耶礼已还坐。复有一比丘，名曰阿难，即从座起，整服作礼，长跪叉手，白世尊曰：「我念宿命，生罗阅祇国，为庶民子，身生恶疮，治之不差。有亲友道人，来语我言：『当浴众僧，取其浴水，以用洗疮，便可除愈，又可得福！』我即欢喜，往到寺中，加敬至心，更作新井，香油浴具，洗浴众僧，以汁洗疮，寻蒙除愈。从此因缘，所生端正，金色晃昱，不受尘垢，九十一劫，常得净福，僧佑广远。今复值佛，心垢消灭，逮得应真。」

阿难于佛前以偈颂曰：

「圣众为良医， 救济苦恼患，
洗浴施清静， 疮愈蒙得安。
所生常端正， 殊异紫金颜，
德润无崖限， 归命良福田。」

阿难礼已还坐。尔时座中有一比丘尼，名曰奈女，即从座起，整服作礼，长跪叉手，白佛言：「我念先世，生波罗奈国，为贫女人。时世有佛，名曰迦叶，时与大众，围绕说法。我时在座，闻经欢喜，意欲布施，顾无所有，自惟贫贱，心用悲感，诣他园圃，乞求果蓏，当以施佛。时得一奈，大而香好，擎一盂水并奈一枚，奉迦叶佛及诸众僧。佛知至意，祝愿受之，分布水、奈，一切周普。缘此福祚，寿尽生天，得为天后。下生世间，不由胞胎，九十一劫，生奈华中，端正鲜净，常识宿命。今值世尊，开示道眼。」

尔时奈女以偈颂曰：

「三尊慈润普， 慧度无男女，
水果施弘报， 缘得离众苦。
在世生华中， 上则为天后，
自归圣众佑， 福田最深厚。」

比丘尼奈女礼已还坐。于时天帝即从座起，为佛作礼，白世尊曰：「我先世时，生拘留大国，为长者子。青衣抱行，入城游观，值遇众僧，街巷分卫。时见人民，施者甚多，即自念言：『愿得财宝，布施众僧，不亦快乎！』即解珠璎，布施众僧。同心祝愿，欢喜而去。从此因缘，寿终即生忉利天上，为天帝释，九十一劫，永离八难。」

于是天帝以偈颂曰：

「德高无过者， 开福塞祸元，
圣众神定力， 童幼发欢喜。
效众悦意施， 迁神典二天，
自归世最厚， 世世愿奉尊。」

佛告天帝及诸大众：「听我所说，宿命所行。昔我前世于波罗奈国，近大道边，安施圜厕，国中人民，得轻安者，莫不感义。缘此功德，所生净洁，累

劫行道，秽染不污，功祚大备，自致成佛。金体光耀，尘水不着，食自消化，无便利之患。」

于是世尊以偈颂曰：

「忍秽修福事，
造厕施便利，
此德除贡高，
进登成佛道，
为人所不污，
烦重得轻安。
因解生死缘，
空净巍巍尊。」

佛告天帝：「九十六种道，佛道最尊；九十六种法，佛法最真；九十六种僧，佛僧最正。所以者何？如来从阿僧祇劫，发愿诚谛，殒命积德，誓为众生，国财、妻子、头目、血肉，以用布施，无恋爱之心。心若虚空，无所不覆，六度、四等众善普备，德慧成满，乃得为佛。身色紫金，相好无比；去来现在，无不照达；三界尊天，莫能及者；言信德重，震动天地。其有众生，发一敬心向如来者，胜获大千世界之珍宝矣！说三十七品、十二部经，分别罪福，言皆至诚，开三乘教，各得奉行，闻者欢喜，乐作沙门，信佛行法，志尚清高。众僧之中，有四双八辈、十二贤者，舍世贪诤，导世开福，天、人路通，众僧之由矣。是为最尊无上之道，诸佛、菩萨、缘觉、应真皆从中出，教化一切，度脱群生。」

佛说是时，天帝释众皆发无上正真道意，不可计人得法眼净。于是阿难长跪叉手，白佛言：「此名何经？云何奉持？」

佛告阿难：「是经名曰“诸德福田”，常奉持之，明宣经道，莫令缺减！」

佛说经已，天帝释众、一切众会，莫不欢喜，作礼而去。

佛说诸德福田经

【经文信息】大正藏第 16 册 No. 0683 佛说诸德福田经

【版本记录】CBETA 电子佛典 Rev. 1.12 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，西莲净苑提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
